

Atendendo ás figuras 1 e 2:



Figura 1. Fonte: Editorial Anaya



Figura 2. Fonte: Google Earth

- Identifique e describa os tipos de documento representados nas figuras 1 e 2.
- Indique os tipos de paisaxes agrarias de España sinalados cos números 1, 2 e 4 na figura 1.
- Comente as características da paisaxe da figura 2.
- Explique as consecuencias do tipo de actividade que se desenvolve na figura 2. (1 punto).

Atendendo ás figuras 1 e 2, conteste:

a) Identifique e describa os tipos de documento representados nas figuras 1 e 2.

Figura 1: mapa **corocromático** de España, con división administrativa provincial e autonómica, indicando os **5 grandes tipos de paisaxes agrarias** existentes.

Figura 2: **fotografía aérea de superficie de invernadoiros**, con cultivos baixo plástico no SE peninsular.

b) Indique os tipos de paisaxes agrarias de España sinalados na figura 1.

- Paisaxe 1: paisaxe da España húmida.
Paisaxe 2: paisaxe de montaña (húmida e mediterránea).
Paisaxe 3: paisaxe da España mediterránea de interior
Paisaxe 4: paisaxe da España mediterránea litoral.
Paisaxe 5: paisaxe agrario canario

c) Comente as características da paisaxe da figura 2.

Esta é unha **paisaxe agraria** na que se distinguen **factores naturais e humanos**:

-Entre os **naturais**, o relevo é **propio dunha chaira**, sen pendentes significativas; o **clima** acada **temperaturas medias elevadas** ao longo do ano -cunha **notable insolación** anual, e **escasas precipitacións** -inferiores aos 250 mm anuais, polo que ten trazas de **aridez dos dominios mediterráneos esteparios ou subdesérticos**.

- Entre os humanos cabe citar un **poboamento disperso**, unha **tenza da terra** predominante en **propiedade directa** - aínda que tamén é importante a cantidade de superficie en aluguer, e un **hábitat disperso** característico de **áreas hortícolas**; a meirande parte das propiedades teñen **dimensións minifundistas**.

A partir dos anos **1970**, a **área do SE peninsular** comezou a desenvolver unha **especialización en cultivos para o mercado**, orientados en moitos casos aos **países membros da CEE** (actual UE). España converteuse daquela na "**horta de Europa**", e nas chairas almerienses **medraron paisaxes**

de invernadoiros e enareados que pasaron a **coñecerse como "mar de plástico"**, pola visión aérea que deste espazo nos proporciona Google Earth. Baixo **o plástico**, créanse unhas **condicións óptimas** para o cultivo de **produtos de horta** (tomate, pepino, pementos, etc.) e **froitas tropicais** que son auténticas primicias mesmo en inverno.

A **PAC favoreceu e promocionou** este tipo de **especialización mediterránea** no caso da agricultura española. É unha área de elevada produtividade, baseada:

- a) no **uso de sementes escollidas** e axeitadas ao gusto do consumidor;
- b) **cultivos transxénicos** para aumentar a produtividade agrícola;
- c) uso **intensivo de fertilizantes e praguicidas**;
- d) nunha **utilización intensiva da auga**, mellorando os sistemas de regadío **por aspersión e pingueira** para tratar de aforrar o consumo deste ben escaso e prezado;
- e) no emprego dunha **man de obra, sobre todo inmigrantes** - de procedencia magrebí e subsahariana, en boa medida de **xornaleiros contratados descontinuamente**.

A **paisaxe resultante é intensiva na ocupación do espazo e uniforme** na imaxe exterior que ofrece.

d) Explique as consecuencias do tipo de actividade que se desenvolve na figura 2.

As **consecuencias** dunha **agricultura intensiva e de mercado**, con **gran ocupación do espazo**, pódense agrupar en:

Económicas: impulso da actividade de produción hortícola, **centros loxísticos e investigación. Asentamentos** do Campo de Dalías (Comarca) como El Ejido **medraron en renda per cápita** e acadaron unha **economía de gran dinamismo**, o que contribúe a incrementar de xeito directo o PIB provincial de Almería. As **tarefas agrarias** teñen moitas veces unha **estacionalidade que repercute no emprego**. Dado o **alto rendemento dos cultivos**, a **poboación activa** do sector **primario é predominante**.

Demográficas: **incremento** da poboación, **rexuvenecemento** por mor da inmigración, **problemas de integración cultural**.

Medioambientais: a **sobreexplotación dos acuíferos e arroios** provoca unha **forte contaminación das augas** do manto freático e **procesos de salinización**; xeración de enormes cantidades de **refugallos plásticos**, dificilmente reutilizables e reciclables; perda de grande cantidade de produtos agrícolas que non chegan al consumidor final; **perda de vexetación autóctona**; **contaminación química** do **solo** polo uso de fertilizantes e produtos fitosanitarios; **incremento das emisións de dióxido de carbono** e contribución ao **cambio climático antropoxénico** por mor da utilización de tecnoloxías baseadas nos combustibles fósiles, e con iso se inicia tamén a **desertificación** deste espazo da Península.

En suma, **hai consecuencias positivas** (alto **dinamismo demográfico e económico**, con fixación da poboación ao territorio) e **negativas** (sobre todo no que atinxe aos **impactos medioambientais**). **Solucionar estes impactos** fará posible -ou non- **manter a alta produtividade** desta área xeográfica.